



**SIUMUT** INATSISARTUNI ILAASORTAATITAT

29. marts 2012

UPA 2012/134

### AAQQIISSUT

Aalajangiussassatut siunnersuut 9. marts 2012-imik ullulerneqartoq taarserpaa, siunnersuutip nutserneqarnerani immikkoortorta q marlunnik titarnilik aaqqiissuteqarneranik kinguneranik teknikkikkut iluarsineqarpoq.

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

**Nunatsinni inuiaqatigiinnik kiffartuussinerup tiimit eqqartuussummut utaqqisitaasumut piumasaqaatit 240 timiniik 300 timinut annertunerpaaffianik annertusinissaa anguniarlugu Naalakkersuisut Danmarkimi Justitsministerimut saaffiginneqqullugit peqquneqarnissaannik Inatsisartut aalajangiiffigisassaattut siunnersuut.**  
(Inatsisartuni ilaasorta q Doris Jakobsen, Siumut)

#### Tunngavilersuut:

Folketingip retsudvalgiani sulininnut atatillugu paasivara aamma Danmarkimi parnaarussivinni inissaqartitsiniarneq ajornartorsiutigineqartoq.

Tamatununga atatillugu justitsministeri Morten Bødskov maannakkut inatsisissatut siunnersuut "Pillaasarneq pillugu inatsimmut allannngortinnissaanik inatsit" ("Lov om ændring af lov om straffeloven") saqqummiussimavaa. (Inatsisissarut siunnersuut L 56).

Siunertarineqartoq tassatuaavoq eqqartuussisut inuiaqatigiinnik kiffartuussinermik siusinnerusumut sanilliullugu amerlanerungaartunik eqqartuussisinnanissaminnut periarfissinneqarnissaat. Imaluunniit siunnersuummut tunngavilersuummi oqaatsit ator neqartut atorlugit: "...inuiaqatigiinnik kiffartuussinermik aaqqissuussap erseqqinnerusumik killiligaasumik annertusiineq..."

Tunngavilersuummi tassani oqaatigineqartut malillugit qallunaat pinerluttunik isumaginnittoqarfiat annertuumik inissaaleqititsivoq, ilaatigut rockerit pinerlunniatigiiit iluatsilluartumik iliuuseqarfigineqarnerat pissutaalluni. Tassalu aamma Danmarkimi pillakkanut inissaaleqititsineqarpoq. Uagutsitorluinnaq.

Taamammat justitsminiterip maanna qaffaanissaq kissaatigaa: "...Inuiaqatigiinnik kiffartuussinermi tiimit eqqartuussummut utaqqisitaasumut piumasaqaatit annertunerpaamik aalajangiunneqarsinnaasut 240-niit 300-nut..."

Tamatumani naatsorsuutigineqarluni inuiaqatigiinnik kiffartuussinerit ator neqarnerata annertusinissaa, ullumikkut kiffaanngissusiiasarnerit sivirusjaamik aalajangerneqartaraluartut. Parnaarussivinni inissaaleqititsinerinnaq taamaaliornermut kisimi peqqutaanngilaq. Taamaaliorneqarpoq misissuinerit takutissimammassuk ikinnerusut pinerluuteqaqqittarsimasut.

Inatsit Kalaallit Nunaannut atuutissanngilaq, uagutsinnimi tamatuma tungaatigut malittarisassat Kalaallit Nunaanni pinerluttulerinermi inatsimmi aalajangigaammata. Tassanilu 240 tiiminik amerlanerpaaffissatut suli aalangiusingimaneqarlutik, eqqartuussiviup pineqaatissiinermi inuiaqatigiinnik kiffartuussineq toqqassappagu.

Inuiaqatigiinnik kiffartuussinermik pineqaatissinneqartigani ”inuttut atugarisanik misissuineq” tunngavigalugu taamatut pineqaatissinneqarnissamut naleqquttuuneq naliliiffigineqaqqaassaaq, tassalu eqqartuussat imannak avatangiisimiinnut ulorianaateqanngitsut kisimik taamatut pineqaatissinneqarsinnaallutik. Kingusinnerusukkut ilaatigut KNR-imi oqallinnerup takutippaa tamanna qaqutiginnaq pisartoq.

Arlaleriarluni maani tusagassiutitigut tusarliuttarpoq suliffeqarfiit inunnik inuiaqatigiinnik kiffartuussinissamut eqqartuussaasimasunik sulisoqassallutik piareersimasut. Saaffiginnittoqarnerli ajorluni.

Tassalu inissiisarfinniinnissamut utaqqisut amerliartuinnarlutik.

Taamaattumik justitsministeri Naalakkersuisullu kajumissaassavakka Kalaallit Nunaanni unnerluutigineqartunut inuttut atugarisaannik misissuisarnerit annertunerusumik ingerlanneqartassat, pineqaatissiissutitut utaqqisitaagallartunut atatillugu inuiaqatigiinnik kiffartuussinerit atornerisigut pinerloqqinnissat pinngitsoortinneqarsinnaaqqullugit.

Tamanna utaqqisorpassuarnik ajornartorsiuteqarnermut maannakkorpiaq iluarsiiisutaanngilaq – siunissamili utaqqisoqarnerup pinngitsoortinniarnanunut alloriarneruvoq pitsaasoq.

### **Aningaasatigut allaffissornikkullu kingunerisassaita nassuiarneqarneri:**

Inuiaqatigiinnik kiffartuussineq pineqaatissiissutitut atorneqartillugu pineqaatissiinernut utikaajaartut ikinnerulertarput. Tassa imaappoq pinerluttut pinerloqqittarnerat appartinneqartarpoq. Siunnersuutip aningaasatigut pitsaaqutai qaninnerusoq isigalugu, anstaltinut inissiisarnerit ikilisinneqassapput, massakkut inissakilliorfioreeqisut.

Ungasinnerusumut inuiaqatigiit aningaasaqarnikkut iluanaaruteqassapput, pinerlunnerillu ikilisinneqarlutik tamatumallu kingunerisusaa inuiaqatigiinnut tunniussassaqaqarneruneq aammalu pineqaatissinneqarsimasut ilaqutallit eqqarsaatigalugit.

Inuiaqatigiinnik kiffartuussinerup nunatsinni atorneqarnerulernissaa siunertaralugu danskit naalakkersuisuinut attaveqaqqullugit Naalakkersuisunut kaammattuutigissavara.